

1. pitanje:

Zanima me kome se mogu obratiti a u vezi finansiranja razvoja jednog projekta. Radi se o pokretanju jedne vrste internet agencije, koja bi na specifičan način "spajala" kupca i prodavce. Ne ulazeći previše u detalje, ideja je jedinstvena i koliko god sam tražio nisam uspio naći ništa slično na ovim prostorima, a svakako da je i profitabilna. Za pokretanje tog projekta, naravno potrebna su određena sredstva i tu je kao i obično problem. Iz Vašeg iskustva, koje institucije bi mogle finansirati/podržati tako nešto (strane ili domaće)?

Odgovor:

Kao prvu mogućnost, imaš obraćanje svojoj Općini. Možeš im se obratiti pismenim putem, šaljući im dopis i koncept svog projekta, na ruke službeniku/ci za mlade (ukoliko ga ima, a po Zakonu o mladima FBiH morao bi biti), a možeš tražiti i direktni razgovor s njim/njom, što je najbolje. Ukoliko nema službenika/ce za mlade traži ko je zadužen za pitanja mladih. Također, raspitaj se u Općini raspisuju li javni poziv za projekte mladih i da li taj poziv obuhvaća i biznis-projekte, ili imaju posebna sredstva za tu svrhu, jer neke ga općine imaju. Na projekte koje daje lokalna zajednica lakše je aplicirati kao udruženje, nego kao pojedinac, ili barem kao neformalna grupa. Ali raspitaj se dobro, Općina mora biti ustanova kojoj se moramo navići obraćati. Sredstva za manje projekte nevladinim organizacijama, recimo, daju organizacije poput SHL (do 4.000 KM) i Centar za promociju civilnog društva (CPCD), ali nismo sigurni obuhvaćaju li i biznise. Najbolje je posjetiti njihove web-stranice i raspitati se. Evropska komisija u BiH također daje sredstva za razvoj biznisa, ali riječ je o velikim projektima.